

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
OPĆINA NOVI GRAD SARAJEVO
Općinsko vijeće

Broj: 01-02-984/26
Sarajevo, 03.02.2026. godine

OPĆINA NOVI GRAD SARAJEVO

OPĆINSKI NAČELNIK

PREDMET: Vijećnička pitanja i inicijative, dostavlja se

Na 13. radnoj sjednici Općinskog vijeća općinski vijećnici postavili su nekoliko vijećničkih pitanja odnosno pokrenuli su vijećničke inicijative sljedećeg sadržaja:

- a) Vijećničke inicijative

-klub vijećnika SDA -

1. Vijećnička inicijativa – uvođenje dodatnog kombi vozila na liniji javnog gradskog prijevoza br. 53 (Švrakino Selo)

Stanovnici Mjesne zajednice „Švrakino Selo II“, kao i korisnici linije javnog gradskog prijevoza broj 53, već duži period se suočavaju s ozbiljnim problemima u funkcionisanju ove linije.

Zbog nedovoljnog kapaciteta vozila, naročito u jutarnjim i poslijepodnevnim satima, građani često nisu u mogućnosti ući u vozilo. Posebno su pogođeni radnici, učenici, studenti, starije osobe i roditelji s djecom, koji ostaju na stajalištima i čekaju naredni polazak, što dovodi do kašnjenja na posao, u školu i na druge obaveze.

Dodatni problem predstavlja činjenica da stanovnici ovog dijela općine nemaju adekvatnu alternativu ovoj liniji, te su u potpunosti oslonjeni na liniju 53 kao osnovni oblik javnog prijevoza.

Zbog navedenog, podnosim inicijativu da Općina Novi Grad Sarajevo, u saradnji sa KJKP GRAS i nadležnim institucijama, pokrene proceduru za uvođenje dodatnog kombi vozila na liniji broj 53, barem u periodima najveće frekvencije putnika.

Ova mjera bi značajno unaprijedila kvalitet života građana Švrakinog Sela, osigurala osnovno pravo na dostupnost javnog prijevoza i smanjila svakodnevne poteškoće s kojima se stanovnici ovog naselja suočavaju.

Molim da se inicijativa podnese što prije prema resornom ministarstvu, te da općinske službe aktivno prate odgovor i realizaciju iste.

2. INICIJATIVA Kluba vijećnika SDA u Općinskom vijeću Novi Grad Sarajevo za uređenje i sanaciju fudbalskog igrališta u naselju Bojnik

Klub vijećnika SDA u Općinskom vijeću Novi Grad Sarajevo podnosi inicijativu nadležnoj općinskoj službi za uređenje i sanaciju postojećeg fudbalskog igrališta u naselju Bojnik, koje koriste Fudbalski klub Bojnik i Škola fudbala Novi Grad.

Na području Općine Novi Grad Sarajevo evidentan je dugogodišnji nedostatak adekvatnih fudbalskih terena, što u značajnoj mjeri otežava rad sportskih kolektiva, posebno onih koji okupljaju djecu i mlade.

Postojeći teren u Bojniku je u funkciji, ali je u lošem stanju i ne zadovoljava osnovne tehničke i sigurnosne uslove za kvalitetno odvijanje sportskih aktivnosti.

Sanacijom i uređenjem ovog igrališta stvorili bi se uslovi za dobijanje dva velika fudbalska terena, čime bi se omogućilo:

povećanje broja termina za treninge i utakmice,

kvalitetniji rad postojećih fudbalskih klubova i škola fudbala,

organizacija sportskih takmičenja,

razvoj novih sportskih i rekreativnih sadržaja na ovom području.

Posebno ukazujemo na potrebu rješavanja pitanja infrastrukturne podrške, prije svega omogućavanja priključka električne energije na kontejnere koji se koriste kao prateći objekti uz igralište, što je neophodno za normalno funkcionisanje sportskih aktivnosti i korištenje terena u popodnevnom i večernjim satima.

Klub vijećnika SDA smatra da bi ulaganje u ovaj sportski lokalitet predstavljalo opravdanu i dugoročno korisnu investiciju, kako za razvoj sporta i zdravih stilova života, tako i za unapređenje ukupne sportske infrastrukture na području Općine Novi Grad Sarajevo. Dugoročno, ovakva ulaganja mogu doprinijeti i povećanju prihoda kroz korištenje sportskih kapaciteta, što ima pozitivan efekat na budžet Općine.

S obzirom na navedeno, predlažemo da nadležna općinska služba razmotri ovu inicijativu i, u skladu sa svojim nadležnostima i budžetskim mogućnostima, pokrene potrebne aktivnosti na sanaciji i uređenju fudbalskog igrališta u naselju Bojnik, te da dostavi pisani odgovor o poduzetim ili planiranim mjerama po ovoj inicijativi.

3. INICIJATIVA Kluba vijećnika SDA u Općinskom vijeću Novi Grad Sarajevo za postavljanje kontejnera za odlaganje otpada u ulici Tjepovački put

Poštovani, kao Klub vijećnika SDA u Općinskom vijeću Novi Grad Sarajevo, podnosimo inicijativu da nadležne općinske službe, u saradnji sa KJKP „RAD“ Sarajevo, razmotre mogućnost postavljanja kontejnera, odnosno formiranja mjesta za odlaganje komunalnog otpada u ulici Tjepovački put.

Kao moguća lokacija predlaže se k.č. 1608/2, katastarska općina Reljevo, površine 2.473 m², koja se nalazi uz navedenu ulicu.

Stanovnici ovog dijela naselja trenutno nemaju adekvatno riješeno mjesto za odlaganje otpada, što uzrokuje probleme s komunalnom higijenom.

Molimo da nam se dostavi pisani odgovor nadležnih općinskih službi, kao i KJKP „RAD“ Sarajevo, o mogućnosti realizacije ove inicijative.

4. INICIJATIVA Kluba vijećnika SDA u Općinskom vijeću Novi Grad Sarajevo za postavljanje oglasnih tabli na području MZ Dobroševići

Poštovani, kao Klub vijećnika SDA u Općinskom vijeću Novi Grad Sarajevo, podnosimo inicijativu da nadležne općinske službe razmotre mogućnost postavljanja oglasnih tabli na području Mjesne zajednice Dobroševići. Cilj ove inicijative je unapređenje informisanja građana o aktivnostima mjesne zajednice, javnim pozivima, obavještenjima i drugim važnim informacijama od značaja za lokalnu zajednicu.

Molimo da nam se dostavi pisani odgovor nadležnih općinskih službi o mogućnosti realizacije ove inicijative.

5. INICIJATIVA Kluba vijećnika SDA u Općinskom vijeću Novi Grad Sarajevo za postavljanje rukohvata za pješake u Ulici Rifata Burđevića

Poštovani, Klub vijećnika SDA u Općinskom vijeću Novi Grad Sarajevo podnosi inicijativu da nadležna općinska služba izvrši postavljanje rukohvata za pješake u Ulici Rifata Burđevića.

Riječ je o dionici ulice koja je posebno rizična u zimskim uslovima, kao i u periodima kiše i povećane vlage, te predstavlja opasnost za sigurnost pješaka, naročito starijih osoba, djece i osoba sa smanjenom pokretljivošću. Postavljanje rukohvata značajno bi doprinijelo sigurnijem kretanju i sprječavanju povreda. Molimo da nam se, u skladu s propisima, dostavi pisani odgovor o mogućnosti realizacije ove inicijative, planiranim rokovima i nadležnostima.

6. INICIJATIVA Kluba vijećnika SDA u Općinskom vijeću Novi Grad Sarajevo prema Zavodu za hitnu medicinsku pomoć Kantona Sarajevo za otvaranje punkta hitne medicinske pomoći na području Općine Novi Grad Sarajevo – Rajlovac

Poštovani, Klub vijećnika SDA u Općinskom vijeću Novi Grad Sarajevo upućuje inicijativu Zavodu za hitnu medicinsku pomoć Kantona Sarajevo za razmatranje mogućnosti otvaranja stalnog punkta hitne medicinske pomoći na području Općine Novi Grad Sarajevo, na lokalitetu Rajlovac, u objektu porodične ambulate Rajlovac.

Općina Novi Grad Sarajevo predstavlja teritorijalno najveću općinu u Kantonu Sarajevo, sa izrazito velikim brojem stanovnika, gusto naseljenim područjima te kontinuiranim porastom broja intervencija hitne medicinske pomoći. Uzimajući u obzir prostornu rasprostranjenost općine, udaljenost pojedinih naselja, kao i sve izraženije saobraćajne gužve, posebno u širem gradskom području, smatramo da postojeći kapaciteti hitne medicinske pomoći nisu u potpunosti prilagođeni stvarnim potrebama građana.

Otvaranjem punkta hitne medicinske pomoći u Rajlovcu značajno bi se unaprijedila dostupnost zdravstvene zaštite građanima Općine Novi Grad Sarajevo, posebno stanovnicima naselja Rajlovac, Reljevo, Brijesće, Zabrđe, Rječica, Dobroševići, Ahatovići i okolnih područja. Također, ovakav punkt bi u velikoj mjeri olakšao rad uposlenicima hitne medicinske pomoći, skratio vrijeme dolaska na intervencije u udaljenijim dijelovima općine, te omogućio bržu i efikasniju reakciju u hitnim i životno ugrožavajućim situacijama.

Smatramo da objekat porodične ambulate Rajlovac, uz određene tehničke i organizacione prilagodbe, može predstavljati adekvatan prostor za uspostavljanje ovakvog punkta, čime bi se na racionalan način iskoristili postojeći zdravstveni kapaciteti.

Klub vijećnika SDA smatra da bi realizacija ove inicijative imala višestruke koristi – kako za građane Općine Novi Grad Sarajevo, kroz bržu i dostupniju hitnu medicinsku pomoć, tako i za sam Zavod za hitnu medicinsku pomoć, kroz bolju organizaciju rada, ravnomjerniju raspodjelu intervencija i smanjenje opterećenja postojećih timova.

S obzirom na navedeno, predlažemo da Zavod za hitnu medicinsku pomoć Kantona Sarajevo razmotri ovu inicijativu, izvrši potrebne analize i procjene, te da nas pisanim putem obavijesti o mogućnostima, planiranim mjerama ili eventualnim preprekama za realizaciju iste.

7. INICIJATIVA Kluba vijećnika SDA u Općinskom vijeću Novi Grad Sarajevo

za izgradnju spomen-obilježja ubijenoj djeci u Olimpijskoj ulici

Predmet: Izgradnja spomen-obilježja na zelenoj površini naspram mjesta pada granate između zgrada u ulici Olimpijska br. 50 i 43, gdje je 4. aprila 1993. godine u 17:00 sati poginulo dvoje djece:

Eldar (Husein) Neslan (1980–1993)

Alen (Enver) Redžepović (1978–1993)

Tom prilikom ranjeno je više maloljetnih osoba: Maumer Basalić, Mladen Buntić, Amela Hadžimuhamedović, Jasenko Hodžić, Semir Hodžić, Meliha Karić, Eldin Neslan i Lejla Rozić.

Prijedlog:

Da Općinsko vijeće Novi Grad Sarajevo zaduži nadležnu općinsku službu da:

izradi idejno rješenje spomen-obilježja u saradnji s porodicama stradalih i Mjesnom zajednicom, planira i osigura potrebna sredstva u Budžetu Općine za njegovu realizaciju.

Molimo da nam se dostavi pisani odgovor po ovoj inicijativi.

8. U ime Kluba vijećnika SDA Novi Grad Sarajevo, podnosimo inicijativu da nadležna općinska služba, u saradnji sa nadležnim organima, izvrši postavljanje saobraćajnog znaka zabrane parkiranja u ulici Omera Kovača – čikma, kod kućnog broja 45.

Na navedenoj lokaciji često dolazi do nepropisnog parkiranja vozila, čime se otežava i onemogućava normalno odvijanje saobraćaja, prolaz pješaka, kao i pristup stambenim objektima i interventnim službama.

Molimo nadležnu općinsku službu da razmotri ovu inicijativu i dostavi pisani odgovor o poduzetim ili planiranim mjerama.

9. U ime Kluba vijećnika SDA Novi Grad Sarajevo, podnosimo inicijativu da nadležna općinska služba, u saradnji sa nadležnim organima, izvrši postavljanje saobraćajnog znaka zabrane parkiranja u ulici Omera Kovača – čikma, kod kućnog broja 45.

Na navedenoj lokaciji često dolazi do nepropisnog parkiranja vozila, čime se otežava i onemogućava normalno odvijanje saobraćaja, prolaz pješaka, kao i pristup stambenim objektima i interventnim službama.

Molimo nadležnu općinsku službu da razmotri ovu inicijativu i dostavi pisani odgovor o poduzetim ili planiranim mjerama.

10. Klub SDA podnosi inicijativu rekonstrukcija pješačke staze u dijelu ulice Safeta Hadžića od broja 108-110 ispred ambulante, pošte i MZ.

11. Klub SDA podnosi inicijativu izrada projektne dokumentacije za rekonstrukciju ulice Gatačka.

-vijećnica Nejra Džanko Zukobašić -

Podnosim inicijativu da Služba za investicije Općine Novi Grad Sarajevo, preispita da li je moguće postaviti/izgraditi zaštitne rukohvate a da se ne smanji širina ulice Ferida Srnje.

Bilo bi značajno da rukohvati obuhvate dio ulice iznad Hifa pumpe do skretanja u ulicu koja vodi u Park šume Mojmilo.

Ulicom Ferida Srnje se kreću brojni pješaci i učenici koji pohađaju JU OŠ "Džemaludin Čaušević" i JU OŠ "Meša Selimović".

-vijećnica Emina Hasanović -

1. Urgentno rješavanje problema parkinga kod Doma zdravlja „Kumrovec“

Na osnovu obraćanja građana i uvida na terenu, podnosim inicijativu zbog dugogodišnjeg problema neuređenog parkiranja kod Doma zdravlja „Kumrovec“.

Riječ je o zdravstvenoj ustanovi od izuzetnog javnog značaja, čiji su prilazi često blokirani nepropisnim parkiranjem, bez jasne regulacije i nadzora. Ovakvo stanje direktno ugrožava sigurnost pacijenata, posebno starijih osoba, osoba s invaliditetom, kao i nesmetan pristup hitnim i interventnim vozilima.

Riječ je o sistemskom propustu u organizaciji saobraćaja i parkiranja koji traje godinama.

Predlažem da se:

1.Zatraži hitnu analizu stanja pristupa i parkiranja u zoni Doma zdravlja „Kumrovec“.

2.Pokrene proces donošenja konkretnih mjera regulacije (prioritet za vozila hitne pomoći, kratkotrajno parkiranje za pacijente, jasno obilježene zabrane i pojačan nadzor).

3.Inicira saradnju s nadležnim kantonalnim institucijama radi trajnog rješenja, uz jasno definirane odgovornosti.

Siguran i funkcionalan pristup zdravstvenim ustanovama mora biti prioritet svake lokalne zajednice.

2. Urgentna analiza zimskog održavanja saobraćajnica i javnih površina na području Općine Novi Grad Sarajevo, s posebnim fokusom na odgovornost nadležnih službi i sistemska rješenja

Na osnovu obraćanja građana i ličnog iskustva, podnosim inicijativu u vezi sa izuzetno lošim stanjem zimskog održavanja saobraćajnica i javnih površina na području Općine. Iako zimsko čišćenje snijega nije u direktnoj nadležnosti Općine Novi Grad Sarajevo, nedopustivo je da građani snose posljedice. Općina, iako nema direktnu operativnu nadležnost, ima obavezu da institucionalno reaguje, traži odgovore, vrši pritisak na nadležne i učestvuje u kreiranju sistemskih rješenja.

Posebno je problematično što je neodržavanje vidljivo u blizini zdravstvenih, obrazovnih i drugih javnih ustanova, čime se narušava osnovno pravo građana na siguran pristup javnim uslugama.

Prilazi i parking prostori uz zdravstvene ustanove, gerontolsokse centre, centre za slabovidne osobe te vrtiće moraju biti tretirani kao apsolutni prioritet u planovima zimskog održavanja.

Predlažem da nadležne općinske službe da od svih nadležnih službi (KJKP-a i LOKOM-a) zatraže pismeno očitovanje o razlozima kašnjenja i neadekvatnog čišćenja, kao i o planiranim mjerama za sprječavanje sličnih situacija u budućnosti.

Predlažem da općina razmotri mogućnosti učešća Općine u izradi dugoročnih i sistemskih rješenja, kako bi se smanjila potpuna zavisnost od kantonalnih službi u situacijama koje direktno utiču na sigurnost i kvalitet života građana.

3. Pобољшanje vidljivosti materijala za održavanje sjednica Općinskog vijeća

U okviru materijala za sjednice Općinskog vijeća, dostavljaju se dokumenti od kantonalnih institucija, javnih preduzeća, ministarstava i drugih relevantnih pošiljalaca koji su nečitljivi ili loše skenirani.

Molim da se ubuduće skenirani dokumenti skeniraju u odgovarajućoj rezoluciji, te se dostave Vijeću na odgovarajući način. U suprotnom rad vijećnika postaje otežan, a za čitanje i analizu jednog odgovora potrebno trostruko više vremena.

Dokumenti koji su se do sada dostavljali nisu čitljivi – tekst se ne vidi i mutan je, te se kao takvi ne mogu koristiti u radu. Molim nadležne službe da preduzmu odgovarajuće korake.

4. Unapređenje tehničkih uslova za održavanje sjednica Općinskog vijeća

Ljubazno molim da se dostavi informacija da li Općina Novi Grad Sarajevo planira preseljenje sjednica Općinskog vijeća u tehnički opremljeniju salu, sa adekvatnim stolovima, mikrofonima i drugim potrebnim sredstvima za nesmetano i efikasno održavanje sjednica.

Smatram da trenutna sala nije adekvatna za kvalitetan rad vijeća, što može otežavati rasprave i doprinosi smanjenju efikasnosti sjednica. Unapređenje tehničkih uslova doprinijelo bi boljoj organizaciji, transparentnosti i produktivnosti rada Općinskog vijeća.

Zahvaljujem na odgovoru i informaciji o planovima u ovoj oblasti.

-vijećnica Selma Alić-

1. Podnosim vijećničku inicijativu prema Službi za investicije Općine Novi Grad za ponovno postavljanje gumenih usporivača saobraćaja koji su već postojali, ali su polomljeni na dijelu ulice Kraljice Jelene.

Ukoliko ste mišljenja da ni ovo nije Vaša nadležnost molim da inicijativu uputite prem KJKP „Rad“. Obrazloženje: Usporivači saobraćaja su već postojali samo ih je potrebno obnoviti zašto ne trebaju veća finansijska sredstva niti bilo kakvi projekti i razmatranja, a kako je već krenulo drugo polugodište u školama neupitna je hitnost realizacije navedenog.

2. Vijećničko pitanje

Nakon upućene inicijative da se u Planu javnih nabavki za 2026.godinu predvidi stavka koja bi omogućila donošenje saobraćajnog elaborata za uspostavljanje jednosmjernog režima saobraćaja u ulici Brčanska od broja 14 do spoja sa ulicom Žrtava fašizma broj 2 naselje Otoka, a Vašeg odgovora da ćete zahtjev razmotriti uzimajući u obzir I Budžetska sredstva postavljam pitanje na zahtjev građana MZ Otoka da li Općina može prihvatiti izrađen elaborat od strane penzionisanog dipl.ing.saobraćaja ovjeren kod nadležnog organa.

3. Podnosim inicijativu za donošenje Odluke o načinu i kriterijima za proglašenje Udruženja od značaja i javnog interesa za Općinu Novi Grad Sarajevo koja kroz svoje servisne centre pružaju podršku djeci i osobama s poteškoćama u razvoju.

Obrazloženje

Polazeći od potrebe da se sistemski uredi i unaprijedi saradnja između Općine Novi Grad Sarajevo i Udruženja koja pružaju podršku djeci i osobama s poteškoćama u razvoju na području Općine u

oblastima od javnog značaja predlaže se donošenje Odluke o načinu i kriterijima za proglašenje udruženja od značaja i javnog interesa za Općinu Novi Grad Sarajevo.

Naime, prema mišljenju nadležnih službi, kako bi se realizovala inicijativa Udruženja porodica djece i osoba s poteškoćama u razvoju „Dajte nam šansu“ za sticanje statusa udruženja od značaja i javnog interesa za Općinu Novi Grad Sarajevo, potrebno je prethodno stvoriti odgovarajući normativni okvir.

Taj okvir bi se utvrdio donošenjem posebne odluke kojom bi se jasno definisali:

oblasti djelovanja udruženja koja mogu steći taj status,

kriteriji i način ocjene ispunjavanja uslova,

postupak i nadležno tijelo za provođenje i kontrolu postupka,

obaveze Općine prema udruženjima koja dobiju status,

te način finansiranja i izvještavanja o utrošku dodijeljenih sredstava.

Donošenjem ove odluke omogućilo bi se da Općina na transparentan, sistematičan i pravičan način prepozna i podrži udruženja koja svojim radom doprinose unapređenju kvaliteta života građana Općine, a posebno osjetljivih kategorija stanovništva.

Općina Novi Grad Sarajevo jeste kroz svoje strateške dokumente i raspoloživa finansijska sredstva iskazivala opredjeljenje za podršku porodicama sa djecom i osobama s poteškoćama u razvoju, između ostalog i kroz sufinansiranje rada Servisnog centra „Dajte nam šansu“, ali ne i kontinuirano.

Međutim, kako bi se osigurala dugoročna i stabilna podrška organizacijama Udruženja koje svoje usluge pruža i kroz Servisni centar, neophodno je donošenje formalne odluke kojom bi se jasno uredio status i obaveze svih strana.

Prijedlog

Predlažem da Općinsko vijeće Općine Novi Grad Sarajevo:

1. Pokrene postupak izrade i donošenja Odluke o načinu i kriterijima za proglašenje udruženja od značaja i javnog interesa za Općinu Novi Grad Sarajevo koje se bavi podrškom porodicama djece i osoba s poteškoćama u razvoju kroz Servisni centar .
2. Zaduži nadležnu službu za izradu nacrtu navedene odluke i da isti uputi Vijeću na razmatranje i usvajanje.
3. Nakon usvajanja odluke, omogućiti primjenu istih kriterija na sva udruženja koja se bave podrškom porodicama djece i osoba s poteškoćama u razvoju kroz Servisni centar koja djeluju na području Općine, u skladu s javnim interesom..

Zaključak

Usvajanjem ove inicijative i donošenjem navedene odluke, Općinsko vijeće bi stvorilo jasan i pravedan okvir za saradnju sa Udruženjima od javnog značaja, čime bi se dodatno osnažio društveni angažman i podrška najranjivijim kategorijama stanovništva.

4. Podnosim urgenciju na inicijativu za pronalaženje adekvatnog prostora na korištenje 150 – 200 m2. Udruženju porodica djece i osoba s poteškoćama u razvoju DAJTE NAM ŠANSU. Servisni centar “Dajte nam šansu“ otvoren je 2014. godine u općini Novi Grad uz podršku Američke razvojne agencije (USAID).

Udruženje koje je registrovano na području Općine Novi Grad svake godine u svom servisnom centru ima sve više korisnika usluga porodica i osoba sa poteškoćama u razvoju koji žive na području naše općine. Prema zadnjim podacima kroz servisni centar sa područja Općine Novi Grad registrovano je 450 porodica što ukupno čini cca 1800 korisnika.

Obrazloženje

Općina jeste prije 10 godine osigurala prostor na najam, ali takav prostor više nije adekvatan za korištenje u pomenutu svrhu.

Naime, korisnici servisnog centra kao i uposlenici udruženja borave u lošim uslovima, Prostor je puno manje kvadrature od potrebne za boravak korisnika, jer kroz centar dnevno prođe 70 korisnika kroz grupe. Prirodne ventilacije skoro da i nema. Prostor je uskraćen za adekvatnu prirodnu svjetlost. Podrumske prostorije neiskoristive su, pune vlage, pod je propao, a za isti zakupnina se dodatno izdvaja. Kancelarijski prostor je premalen i neprilagođen potrebama zaposlenih.

Moram istaći da u centru borave osobe bez obzira na stepen invalidnosti podjeljeni u grupama naravno prema svojim potrebama što je veoma pohvalno da udruženje pruža podršku bez kriterija za korisnike.

Ukoliko nedobijemo konkretnu podršku načelnika i službe za urbanizam za hitnim rješenjem ovog problema dovodi se u pitanje dalji rad i pružanje potreba korisnika što nebi bilo pozitivno za našu lokalnu zajednicu.

5. Prije godinu danapodnijela sam inicijativu za postavljanje rukohvata u dijelu ulice Smaila Šikala tačnije početak uspona ulice od broja 99 do broja 105 sa jedne strane ulice. Odgovor služba bio je da će se u narednom periodu sagledati sve potrebno za realizaciju navedenog te će se postavljanje rukohvata realizirati shodno finansijskim sredstvima.

Ponovo podnosim urgenciju na istu inicijativu u nadi da će se obećano realizovati što prije.

-vijećnica Armela Humić -

1. INICIJATIVA za uređenje i rekonstrukciju trotoara duž ulice Safeta Hadžića (Aneks – Sud BiH)

Upućujem inicijativu za hitno uređenje i potpunu rekonstrukciju trotoara duž ulice Safeta Hadžića, na relaciji od Aneksa do Suda Bosne i Hercegovine. Napominjem da sam ovu inicijativu više puta do sada podnosila, te da ću je nastaviti podnositi sve dok se konkretne aktivnosti na terenu ne pokrenu i dok se problem ne riješi.

Trenutno stanje trotoara na ovoj dionici predstavlja ozbiljan sigurnosni problem za sve pješake. Podloga je popucala, neravna, na više mjesta su vidljive duboke rupe i udubljenja zbog kojih se svakodnevno rizikuje pad i povreda. Situacija je dodatno pogoršana u zimskom periodu, kada snijeg i led zaklanjaju oštećenja, pa se građani doslovno boje napraviti korak kako ne bi slomili nogu.

Poseban problem predstavlja trolejbusko stajalište koje je u potpuno dotrajalom i neadekvatnom stanju. Beton je raspucao, površina je izlomljena, postoje otvori i pukotine koje su opasne prilikom ulaska i izlaska iz vozila. Takvo stanje je neprihvatljivo, s obzirom na to da stajalište svakodnevno koriste stotine građana, uključujući studente, školace, radnike i službenike brojnih institucija.

Također, posebno naglašavam da je nužno urediti i dio trotoara koji vodi direktno ka Sudu Bosne i Hercegovine. Radi se o prilaznom putu jednoj od najvažnijih institucija u državi, te je neprihvatljivo da pješačka površina izgleda zapušteno, neuredno i nesigurno za kretanje. Uredan i siguran pristup Sudu BiH trebao bi biti prioritet, kako iz sigurnosnih, tako i iz reprezentativnih razloga.

Stoga molim da se pokrene postupak:

1. Kompletne rekonstrukcije i nivelacije trotoara na cijeloj navedenoj dionici
2. Sanacije i uređenja trolejbuskog stajališta, sa sigurnim i stabilnim podom
3. Uređenja pristupnog trotoara prema Sudu BiH, kako bi se obezbijedio siguran, uredan i dostojan ulaz u državnu instituciju od najvećeg značaja

Smatram da bi realizacija ove inicijative značajno doprinijela sigurnosti pješaka, kvaliteti javnog prostora i općem vizuelnom utisku ove važne gradske zone.

2. Pozivajući se na Poslovnik Općinskog vijeća Novi Grad Sarajevo, molim nadležnu službu za pojašnjenje procedure u situaciji kada predlagač tačke dnevnog reda, koja je već uvrštena u dnevni red sjednice, povuče istu na samoj sjednici bez obrazloženja. U cilju transparentnosti rada, molim pojašnjenje ko je ovlašten prihvatiti takvo povlačenje te da li je ovakva praksa u potpunosti usklađena s odredbama Poslovnika Općinskog vijeća Novi Grad Sarajevo.

3. Bila bi zahvalna da se svim vijećnicima hitno dostave ažurirani kontakt-emailovi nadležnih službi sistematizirani po oblastima njihove nadležnosti. Ovo bi prije svega značajno olakšalo rad novim vijećnicima koji se ranije nisu imali priliku susretati s ovakvom vrstom komunikacije, te bi doprinijelo efikasnijem, bržem i odgovornijem djelovanju vijeća u cjelini.

-vijećnik Adi Škaljić-

1. Upućujem inicijativu za uspostavljanje programa ranog otkrivanja i prevencije deformiteta kičmenog stuba i stopala kod učenika osnovnih škola na području naše općine.

O B R A Z L O Ž E N J E

Učestala pojava nepravilnog držanja i deformiteta kičmenog stuba kod učenika osnovnih škola zahtijeva hitnu i sistemsku reakciju lokalne zajednice. Inicijativa predviđa uspostavljanje programa preventivnih pregleda u svim osnovnim školama na području Općine Novi Grad Sarajevo, u direktnoj saradnji sa stručnim timovima KJU Dom zdravlja KS. Cilj je rana identifikacija skolioze, kifoze i ravnih stopala kod djece u fazi intenzivnog rasta, kada su korektivne vježbe i tretmani najefikasniji. Program bi, pored dijagnostike, uključivao i edukativne radionice za roditelje i nastavnike o važnosti pravilnog sjedenja i adekvatne fizičke aktivnosti. Implementacijom ove inicijative, Općina bi osigurala besplatnu stručnu podršku djeci, prevenirajući dugoročne zdravstvene probleme i smanjujući potrebu za kasnijim skupim operativnim zahvatima. Ulaganje u rano otkrivanje deformiteta predstavlja direktno ulaganje u zdravlje budućih generacija i podizanje standarda javnog zdravstva na lokalnom nivou.

2. Upućujem inicijativu za razmatranje kreiranja radnih brigada za čišćenje snijega pri mjesnim zajednicama na području naše općine.

O B R A Z L O Ž E N J E

S ciljem efikasnijeg odgovora na zimske padavine, pokreće se inicijativa za formiranje radnih brigada sastavljenih od građana pri mjesnim zajednicama Općine Novi Grad Sarajevo. Ove brigade bi služile kao organizovana ispomoć komunalnim službama, fokusirajući se na čišćenje pješačkih zona, pristupa školama i prilaza domovima zdravlja. Angažmanom lokalnog stanovništva značajno bi se ubrzala prohodnost unutar naselja, čime se direktno povećava sigurnost kretanja svih kategorija građana. Inicijativa podrazumijeva da Općina obezbijedi neophodan alat i opremu, dok bi koordinacija bila povjerena savjetima mjesnih zajednica. Ovakav model ne samo da rješava infrastrukturne izazove, već i snažno potiče solidarnost te jača duh zajedništva u kriznim situacijama. Uvođenje radnih brigada osiguralo bi da nijedna ulica, bez obzira na prioritet održavanja, ne ostane blokirana tokom intenzivnih snježnih padavina.

-vijećnica Selma Pršeš-

1. Na osnovu Zakona o principima lokalne samouprave u Federaciji Bosne i Hercegovine podnosim inicijativu prema kabinetu općinskog načelnika za formiranje posebne komisije koja bi imala zadatak da sagleda stanje na području Općine Novi Grad Sarajevo u vezi sa radom objekata za igre na sreću (kladionice, automat-klubovi i sl.), s posebnim fokusom na njihovu udaljenost od obrazovnih ustanova. Za zadatak komisije predlažem:

- da izvrši analizu postojećeg stanja i evidentira sve objekte za igre na sreću na području Općine Novi Grad Sarajevo.

- da utvrdi da li se ti objekti nalaze na propisanoj udaljenosti od osnovnih i srednjih škola, u skladu sa važećim zakonima i podzakonskim aktima,

- da sačini pisani izvještaj sa zatečenim stanjem i preporukama, te da predloži eventualne mjere i aktivnosti koje Općina Novi Grad Sarajevo može poduzeti u okviru svojih nadležnosti.

Smatram da je ova inicijativa od posebnog značaja za zaštitu djece i mladih, prevenciju negativnih društvenih pojava povezanih s igrama na sreću, te stvaranje sigurnijeg i zdravijeg okruženja na području Općine Novi Grad Sarajevo.

2. Podnosim inicijativu prema službi za investicije za postavljanje saobraćajne signalizacije – saobraćajne table koja upozorava na radar/kontrolu brzine u ulici Safeta Zajke, u dijelu kod cvjećare.

U navedenoj ulici već postoji stacionirani radar, odnosno kamera za kontrolu brzine kretanja vozila, međutim ne postoji adekvatna i jasno vidljiva saobraćajna tabla koja bi vozače unaprijed upozorila na prisustvo kontrole brzine.

3. Podnosim inicijativu prema službi za investicije za sanaciju i obnovu košarkaškog igrališta u školskom dvorištu JU OŠ „Behaudin Selmanović“ u MZ Briješće, sanaciju dijela ulice Safeta Zajke, od broja 270 do 294 (kod Vatro-sistema) i sanaciju puta u ulici Jusufa Juke Gojaka, od ulaza do broja 11. Ukoliko nije moguće realizovati sve navedeno u ovoj budžetskoj godini, predlažem da se sanacija planira fazno, prema stepenu ugroženosti i važnosti za mjesnu zajednicu Briješće.

4. Tražim informaciju od Službe za obrazovanje Općine Novi Grad Sarajevo:

- Koliko odjeljenja na području Općine Novi Grad Sarajevo je obavilo obaveznu školu plivanja u školskim godinama 2024/2025 i 2025/2026.

- Koliko odjeljenja je obavilo obaveznu školu skijanja u istim školskim godinama.

Molim vas da podaci budu dostavljeni po nazivima škola i odjeljenja, kako bi se imao detaljn uvid u informaciju.

-vijećnica Edita Šandal -

1.Podnosim inicijativu za hitnu sanaciju javne rasvjete u ulicama Kralja Stjepana Tomaševića, dio Brezanske, Brijesće brdo i Brijesće brdo čikma.

Prema informacijama sa terena, radi se o kvaru na trafostanici 1379, gdje od tri faze radi samo jedna, zbog čega javna rasvjeta funkcioniše fazno – svijetli svako treće rasvjetno tijelo. Takvo stanje značajno smanjuje vidljivost i otežava sigurnost kretanja, posebno za pješake.

Obzirom da uskoro počinje mjesec Ramazan očekuje se povećan broj vjernika koji će pješaćiti ka džamiji na ulici bez pješačkih staza te tražim da nadležne službe hitno izvrše popravku javne rasvjete i saniraju kvar na trafostanici 1379, kako bi se osigurala sigurnost svih učesnika u saobraćaju.

2.Podnosim inicijativu za rekonstrukciju i uređenje mezar Ajkune Đerzelez, koji se nalazi u krugu preduzeća GRAS.

Ajkuna Đerzelez je, prema usmenoj predaji sestra Alije Đerzeleza, legendarnog bosanskog junaka i jednog od najznačajnijih likova bošnjačke i bosanskohercegovačke epske književnosti. Lik Alije Đerzeleza prisutan je u narodnim pjesmama, predajama i književnim djelima, te predstavlja simbol hrabrosti, časti i borbe, zbog čega ima posebno mjesto u kulturno-historijskom identitetu Bosne i Hercegovine.

Priča o Ajkuni Đerzelez, povezana s njenom tragičnom sudbinom i motivima nevinosti i časti, neodvojiv je dio tog epskog naslijeđa i važan segment kolektivnog pamćenja Sarajeva. Mezar Ajkune Đerzelez ne predstavlja samo mjesto ukopa, već i vrijedan simbol kulturne i historijske baštine.

Trenutno stanje mezar je zapušteno i neprimjereno njegovom značaju. Za ovu lokaciju je ranije izrađeno idejno rješenje uređenja, koje predviđa očuvanje postojećih nišana, izgradnju otvorenog turbeta i uređenje prostora, uz poštivanje ambijentalnih i historijskih vrijednosti.

Ministarstvo saobraćaja Kantona Sarajevo raspisalo je javnu nabavku za izradu idejnog projekta i tehničku pomoć za rekonstrukciju i modernizaciju tramvajskog depoa u neposrednoj blizini mezar Ajkune Đerzelez. Postoji ozbiljna opasnost da izvođenje ovih radova dovede do nepopravljivog oštećenja ili potpunog narušavanja mezar, što bi bilo neprihvatljivo i skandalozno s obzirom na njegov historijski značaj.

S obzirom na sve navedeno, smatram da je neophodno čim prije pokrenuti konkretne aktivnosti na rekonstrukciji, zaštiti i trajnom održavanju mezar Ajkune Đerzelez.

3.Podnosim inicijativu za hitnu reakciju u vezi sa pojavom pacova u MZ Buća Potok i Dolac Veliki broja stanovnika pomenutih mjesnih zajednica izrazili su ozbiljnu zabrinutost zbog pojave pacova u neposrednoj blizini kontejnera na spoju ulica Adema Buće, Trebinjska i Otona Župančića.

Prema tvrdnjama stanovnika, posebno u večernjim satima, na ovom području pojavljuje se ogroman broj pacova – procjenjuje se da ih je oko 20 i više, što izaziva strah i zabrinutost zbog mogućnosti širenja zaraznih bolesti i ugrožavanja higijenskih uvjeta u naselju.

S obzirom na ozbiljnost situacije i potencijalni rizik po zdravlje, molim vas za što hitnije poduzimanje adekvatnih mjera deratizacije.

4.Roditelji i odgajatelji Vrtića „Žubor“ obratili su mi se s prijedlogom za izgradnju stepeništa i rukohvata koji bi omogućili djeci da direktno i sigurno dođu do igrališta.

Trenutno djeca i odgajatelji idu dužim i manje sigurnim zaobilaznim putem što predstavlja nepotreban rizik i otežava svakodnevni pristup igralištu, posebno za mlađu djecu.

Predlažem izgradnju stepeništa između vrtića i igrališta, postavljanje rukohvata zbog dodatne sigurnosti, eventualno manje stazice od izlaza iz vrtića do igrališta. Molim nadležne službe da ovo što prije razmotre i pokrenu potrebne aktivnosti kako bi se inicijativa realizovala.

5. Podnosim inicijativu za rekonstrukciju dječijeg igrališta kod vrtića „Srećica“. Trenutno igralište je nesigurno, jer ne posjeduje gumenu podlogu koja se nalazi na većini ostalih dječijih igrališta. Često ovo igralište u ljetnom periodu bude zapušteno sa visokom travom te je gumena podloga na ovoj lokaciji zaista neophodna.

-vijećnik Mirza Memišević -

1. Inicijativa – Obezbjedivanje specijalizovanih vozila za čišćenje ulica

Upućuje se inicijativa nadležnim općinskim službama da se, u saradnji s javnim preduzećima obezbijede dodatna specijalizovana vozila za mašinsko čišćenje i pranje ulica na području Općine Novi Grad Sarajevo.

Postojeći kapaciteti za održavanje komunalne čistoće nisu dovoljni da odgovore potrebama općine.

Cilj inicijative je unapređenje komunalne higijene, smanjenje prašine i zagađenja te uredniji javni prostor.

2. Inicijativa – Nabavka vozila i opreme za zimsko održavanje saobraćajnica

Upućuje se inicijativa nadležnim općinskim službama da se u saradnji s javnim preduzećima pristupi nabavci vozila i prateće opreme za zimsko održavanje saobraćajnica na području Općine Novi Grad Sarajevo.

Postojeći kapaciteti za zimsko održavanje nisu dovoljni da osiguraju pravovremeno i kvalitetno čišćenje snijega i uklanjanje poledice, naročito u lokalnim i strmim ulicama.

Cilj inicijative je povećanje sigurnosti učesnika u saobraćaju i bolja prohodnost saobraćajnica u zimskim uslovima.

3. Inicijativa – Donošenje Odluke o načinu održavanja javnih parking prostora

Upućuje se inicijativa nadležnim općinskim službama da se pripremi i donese Odluka o načinu održavanja javnih parking prostora na području Općine Novi Grad Sarajevo.

Odlukom je potrebno jasno definisati nadležnosti za redovno i vanredno održavanje parking prostora, uključujući čišćenje, pranje, zimsko održavanje, sanaciju oštećenja i nadzor nad izvršavanjem obaveza.

Cilj inicijative je osigurati uredne, funkcionalne i sigurne javne parking prostore te spriječiti prebacivanje odgovornosti između institucija.

4. Inicijativa – Hitno čišćenje prostora oko kontejnera

Upućuje se inicijativa nadležnim općinskim službama i KJKP „RAD“ da se hitno izvrši čišćenje prostora oko kontejnera, posebno na lokacijama gdje se gomila ili se tokom prethodnih sniježnih padavina nagomilovao otpad izvan kontejnera.

Ostaci iza nagomilovanog otpada oko kontejnera predstavlja higijenski i zdravstveni problem te narušava izgled naselja.

-vijećnik Jasmin Smječanin -

1. Podnosim inicijativu za postavljanje javne rasvjete u ul. Derviš Fevzi Mostarca kod brojeva 43 i 45 Ima stub od elektroprivrede, samo bi trebalo postaviti sijalicu za rasvjetu.

SEKRETAR
OPĆINSKOG VIJEĆA

Elvir Kosovac, dipl. pravnik

DOSTAVITI:

1. Naslovu
2. a/a